



Semo tuti piassè poareti

Tra crisi econòmica, conti in rosso, manovre coretive, finanziarie e taji a le spese, bufere politiche, inchieste e processi a furbeti, ladri e disonesti... có riva sera a semo tuti piassè poareti

In sto clima de tortura estiva, sarà stà colpa del sole che ne brusava i zarvèi, sarà stà par le notizie che 'ncora ne piove 'dosso come colpi de manara so la zoca, fato sta che se semo resi conto che ... i conti no quadra: ghemo perso calcosa de inportante.

Intanto semo diventà pi poareti de schei: ne lo conferma i dati Istat che ne dise che in Italia a ghe xe 2 milioni e 657 mila fameje che vive col minimo indispensabile; ghe xe persone che canpa col solo aiuto de le associazion caritative locali e altre che ghe toca umiliarse a slongare la man drio on marciapiè, sperando nel bon core de la gente.

Disemo però che, se lassemo stare i nùdari, ste situazion le ghe jera anca na volta: mi me ricordo che, pi de sessant'ani fà, me mama me mandava a portarghe na sporta de roba da magnare a na fameja de miserandi, co na sgnarà de fiò che naséa via piè partera anca in pieno inverno, co on fogo che brusava fassine de cane e, taca a la catena, na pegnata che bojéa senpre quel che drento no ghe jera. A me ricordo che anca noantri a jèrimo poareti: me popà, mediatore da canpi, jera sior de parola e basta, el n'è fato vivere da poareti e, có 'l xe morto

el n'è lassà na granda eredità: l'onestà. De quella semo senpre stà siori e la ne ga senpre giovà.

Eco, propio de questa e de tanti altri valori che ghe someja, sentimo oncò la macanza. Coruzion, concussion, *peculato*, *guadagni illeciti*, *associazione a delinquere*, *abusi d'ufficio*, mafia, camora, 'ndrangheta: tuti fenòmeni de la socetà del nostro tempo, che, oltre a farne vergognare pa 'l disonore, i ne squalifica moralmente e civilmente.

Metemo pure che, da che mondo xe mondo, ste robe le sia senpre esistie, ma la pi parte le restava ne l'onbra e, quasi quasi, le faséa manco dano. 'Desso, invece, che ste malfate le vien a gala, 'desso che le vien scoperte, a se sentimo 'ncora

de pi disgustà e se sentimo in braghe de tela.

Semo dunque diventà pi poareti de schei e de onestà, ma anca pi poareti de fede. E no stemo dire che a se semo spoetizà e che ghemmo manco fede, a causa de le denunce de abusi da parte de na categoria de persone che credévino vacinà contro la pedofilia. Dire che ghemo perso la fede a causa de sti scàndali, no la xe na bona scusa: la fede xe diventà on *optional*, la fa senpre manco parte de la normalità umana.

Colpa de la fameja, colpa de la Cesa, colpa de on progresso che core come on fiume in piena e no tien pi conto de i àrzari, semo catà anca noantri a nar via de corsa, lassando

indrio tuto quello che ne paréa èssarne de peso e de freno: senza Comandamenti, senza règole de religion se core pi forte.

De fato, oncò par stare al passo e no farse superare, se fa tuto piassè in pressia, a se se scana a córare de pi par laorare, par guadagnare, par vivare, par divertirse e, de le volte, par morire. Se al contrario, qualche volta, a fùssimo boni de vardarse intorno e magari indrio, a se inacorzaréssimo che ghemo perso par strada chel tanto – sorattutto onestà, moralità e fede – che ne ga fato piassè poareti.

Altre persone, par no morire de fame, le zerca tra i rifiuti...

